



Sesida dals

15 da mars 2020

Communitgà ils

15 da mars 2020

Protocol nr.

180

Coronavirus (COVID-19)

Mesiras dals 15 da mars 2020 per cumbatter il coronavirus

1. Sin fundament dal svilup da la situaziun cun il coronavirus (COVID-19) han il Cussegl federal, la Regenza dal chantun Grischun sco er l'exteriur vischin concludì differentas mesiras che restrenschan la vita publica. Malgrà questas mesiras s'augmenta il dumber da persunas infectadas cun il coronavirus fermamain en il chantun Grischun. Actualmain èn tschintg persunas ospitalisadas, duas da quellas en in stadi critic sin ina staziun da tgira intensiva.
2. Pervia dal grond privel d'infezziun e per cumbatter l'ulteriura derasaziun dal coronavirus, s'imponi da relaschar mesiras supplementaras per proteger la sanadad da la populaziun, ultra da las mesiras che la Regenza ha concludì ils 13 da mars 2020 (conclus da la regenza dals 13 da mars 2020, prot. nr. 179).

Sa basond sin l'artitgel 16 alinea 1 litera e da la Lescha davart la protecziun da la populaziun en il chantun Grischun (Lescha davart la protecziun da la populaziun, LPPC; DG 630.000) sco er sin proposta dal Departament da giustia, segirezza e sanadad

concluda la Regenza:

1. A partir da glindesdi, ils 16 da mars 2020, a las 12.00, per entant fin ils 30 d'avrigl 2020, a las 24.00, valan las suandantas mesiras supplementaras:

- La populaziun vegn supplitgada da reducir sia mobilitad al minimum necessari.
- Tut las fatschentas da commerzi en detagl (gronds negozis e butias), ils manaschis da restauraziun (p.ex. restaurants, bars, bistros, cafés, snack-bars e pitschnas ustarias sin bains pursils) e las purschidas da bellezza (p.ex. saluns da bellezza, saluns da coiffeur e spas, er d'hotels) ston vegnir serrads.

Exceptads da la serrada èn, resguardond strictamain las recumandaziuns da l'Uffizi federal da sanadad publica (UFSP) concernent l'igièna e la distanza sociala:

- negozis da victualias, incl. partiziuns da victualias dals gronds negozis (quels dastgan er vender ils products urgentamain necessaris dal diever quotidian [p.ex. palpiri da tualetta, pezs, pulvra da lavar, glischs, apparats electric]), pasternarias, mazlarias, latgarias, butias da bains pursils e.u.v., che han annunzià lur activitad a l'Uffizi per la segirezza da victualias e per la sanadad d'animals (USVA), sco er manaschis da pavel d'animals;
- cantinas senza traffic public da glieud sco cantinas da manaschis;
- secturs d'alimentaziun d'internats e da chasas d'abitar exclusivamain per abitantas ed abitants;
- tancadis, negozis da tancadi e kioscs;
- furniziuns da pasts tras restaurants, curriers da pizza e.u.v. u stans da vendita mobils senza restauraziun e consumaziun al lieu;
- manaschis che porschan servetschs che dovran ina permissiun per pratitgar ina professiun tenor la Lescha davart la protecziun da la sanadad en il chantun Grischun (Lescha da sanadad; DG 500.000) (p.ex. apotecas, drogarias, fatschentas d'optica, fatschentas d'apparats d'udida, fisioterapias, praticas da massascha medicinala);
- spurteglis da banca e da posta.

En il medem manaschi na dastgan betg sa trategnair a medem temp tut en tut pli che 50 clientas e clients.

- A manaschis d'hotellaria èsi vinavant permess da porscher pernottaziuns e d'ospitar lur giasts sco er il persunal resguardond strictamain las recumandaziuns da l'Uffizi federal da sanadad publica (UFSP) concernent l'igièna e la distanza sociala. Persunas che na pernotteschan betg en l'hotel, na dastgan betg vegnir ospitadas. En il medem manaschi da restauraziun d'in hotel na dastgan betg sa trategnair a medem temp pli che 50 persunas inclusiv il persunal.
 - Tut las occurrenzas religiusas èn scumandadas. Sepulturas èn permessas en il circol il pli stretg da la famiglia (conjugals, consorts, geniturs, fragliuns, uffants, uffants confidads, geniturs adoptivs e nons).
2. La controlla da questas mesiras è chausa da las vischnancas.
 3. Comunicaziun a tut las vischnancas, a tut ils departaments ed a tut ils posts da servetsch sco er a la Chanzlia chantunala per la publicaziun en il Fegl uffizial.



En num da la Regenza

Il president:

Dr. Chr. Rathgeb

Il chancelier:

Daniel Spadin